

Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2018-imeersoq.

(Aningaasaqarnermut Nunanilu Avannarlerni suleqatigiinnermut Naalakkersuisoq)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Pingajussaaneerinnineq

Aningaasaqarnermut Akileraartarnermullu Ataatsimiititaliap ilassutitut isumaliutissiisummik sukumiisumik suliaqarneranik Naalakkersuisut sinnerlugit qujassuteqarfigaara.

Ataatsimiititaliap isumaqatigiittup siunnersuutip pingajussaaneerineqarnerani taama iluseqartillugu akuersissutigineqarnissaanik inassuteqarnera Naalakkersuisut iluarinartuutippaat.

Taamaalilluni sinneqartoorutit Kalaallit Nunaanni pilersinneqartut aamma maani akileraaruserneqartarnissaanik Kalaallit Nunaata patajaatsunik akileraartarnikkut maleruagassaqarnissaanik qulakkeerinninniarluni sulinerup amerlanerussuteqarluartunit tunuliaqutserneqarnera takutinneqarpoq.

Ataatsimiititaliap ilassutitut isumaliutissiisummini namminersorlutik inuussutissarsiortut ATV-nik snescooterinillu pisinermi aningaasartuutunik ingerlaannartumik nalikilliliinissamut periarfissaqarnissaanik kissaateqarpoq. Ataatsimiititaliap aammattaq kaammattuutigaa ataatsimiinnissami tullermi, tassa 2019-mi upernaakkut ataatsimiinnissami, siunnersuut saqqummiunneqassasoq.

Malittarisassanik suliaqartarnermi maleruagassiat maanna atuuttut naapertorlugit upernaakkut ataatsimiinnissamut siunnersuusiornissaq, taamatullu aamma innuttaasunut tamakkiisumik tusarniaanissaq pisinnaangillat.

Naalakkersuisulli ataatsimiititaliap kaammattuina akuersaarnartippaat, taannalu 2019-mi ukiakkut ataatsimiinnissamut inatsisissamut siunnersuummut ilanngunneqarsinnaanersoq isumaliutigissallugu.

Taamaattoqassappallu sulinermut ilanngaati imaluunniit sulinermut tapiissutip eqqunneqarnissaanut atatillugu inatsisissamik piareersaasiarluni suliani aallartinneqareersuni, ataatsimiititaliap kissaataasa ilanngunneqarnissaanut periarfissaqassaaq. Siunnersuut tassunga tunngasoq 2019-imi ukiakkut ataatsimiinnissami saqqummiunneqartussatut naatsorsuutigineqarpoq.

Taama oqaaseqarlunga siunnersuut Inatsisartunut suliassanngortippara.